

1 Timoti

Pol re Timoti rene kiyi basrasem siglow.

Kiyi late tuma.

Gwor siglow Pol re basrasen Timoti rene newopitim. Re Timoti rene siglow pes newopitim. Gwor siglow et kiyi basrasem siglow.

Timoti re God rene omuteke habobem muyen siyen tame. Re Galesia yokwori kwom Listrake yam tame. Re Juda tame bo. Reri nawet te Juda ta, reri har re Grik tame. Pol re God eterri tuma Litra kwomke yin wesowbem, Timoti re er tuma metem, re Jisas rene omuteke habom. Aposel 16:1 etop webu. Yuri re Pol rekene God eterri yaku nenbem. Sene re Efesus kwomri God rene omuteke habobem tatame etemri lakere tame tem. Pol re Timoti rene wem, re heyar la. Tatame rem God rene omuteke habobokap, agerbo tame rem yaper kap nente. Er tame remri habobemkap et kena, rem op webu. Nowselri wos et yenbo bo. Eker tatame rem heyar tete wete, rem rane awos sewaite, tame rem ta remne kap panete. Sene re rene God rene lom yokwobo wulekene God rene omuteke habobem tatame remne lakere yaku tumakene basrasem. Sene re Timoti rene wem, re Jisas Kraisi reri yaku nente tame yenbo tete. Re God rene omuteke habobo tatame wurlare wulare remne nente wule re basrasem.

**Timoti re reri nenbokap lakerete,
re God rene omuteke habobo**

tatame remri nenbopak kirkir heyar lakerete.

(Sapta 1–6)

¹ An Pol, an Krai Jisas reri werasen yi tame. God re nemne sene potem, Jisas Krai rene nem rene late kowtene, rep anne lebam, an repri werasen yi tame tem.

² Timoti, ne Krai Jisas rene omutek habobo, ne ari yen sekenekap tem. An nene gwor siglow basrasbo. Nemri Apei Godkene nemri Haneyen Jisas Kraiskene rep nene pap meten kwobo late. Rep nene pap pultete, ne pap yenbo temente.

Yikoko tuma nem teitkwunte.

³ Kiyi an Masedonia nowselke yibem, an nene wem tuma an nene sene webu. Ne Efesus kwomke som temente. Etek tetane tame, rane rem God rene omuteke habobo tatame remne wule yaper wesowbo. Ne remne sewaite. Rem yikoko tuma kap wesowte. ⁴ Rem sike bop kap wesowte. Rem yeiwarege remri sig nogwape kap namrete. Opkap tumake rem wuribai pasupte, rem God reri wule omuteke be habote. God re nemne nentekap, rem heyar be mette. ⁵ God re nemne nente yaku et tatame rem God rene omutekewai habote, God re remne late, rem tatame yenbo. Rem sanete, God re labo, rem yaper wos be nenbo. Etopkap wule et remne lesokte, rem agerbo tatame remne pap yewote. ⁶ Rane tame rem er wule sekene mesegenem, rem wor ten agerbo agerbo tuma bupo me namrebo. ⁷ Rem selbo, rem God reri wule peikbo tame tete. Remri webu tuma rem habobo, et sekene. Remri webu

tuma tobo rem heyar be metbo, rem tuma bupo me webbo.

⁸ Nem santene. Tatame rem God re Moses rene newom Wule heyar meten tobote, et wule yenbo rem tobote. Etop tete, nem wete, et wule yenbo. ⁹ Ekeya! Nem mettene, God re Moses rene newom Wule re yenbo nenbo tatame remne be sewaibo. Yehow. Re yaper nenbo tatame remne sewayen tuma webbo. Gwopkap tatame God re remne sewayen tuma webbo. Wule biragiyebo tame, God Reri Tuma be metbo tame, sebera ya wos nenbo tatame, God rene tame kwoyabo tame, nowselri wule nenbo tame, nawoha repne pen sabo tatame, alwo pen sabo tame, ¹⁰ muye bisi mare bisi yibo tatame, tame rem agerbo tamesip tamesip wule yaper nenbo, ta rem agerbo tasip tasip wule yaper nenbo, agerbo tameri yen bisi potbo tatame, yikokobo tame, tuma nen akek yikokobo tame, tuma sekene be meten nenbo tatame. God re Moses rene newom Wule re opak tatame remne sewayen tuma webbo. ¹¹ Er tuma et God reri Tuma Yenbo re anne wesowte werasemkap. Er tuma et Keryen Yen God rene webbo, re yenbosubuwai. Re me malobo.

God re Pol rene pap metem, eker Pol re God rene wese am.

¹² An neremri Haneyen Krais Jisas rene wese abo. Re anne kitimena newobo, an yaku nenbo. Re anne se pen lan op wem. Pol re ari yaku kebasi nente tame. Op wem, re anne gwor yaku werasem. Eker an rene wese som abo. ¹³ Sekene, kiyi an rene tuma yaper wen kwoyan God rene omuteke habobo tatame remne yaper

nenbem. An Kraiſ rene be metmenem, an wor temenem, an etop nenbem. Eker God re anne pap metem. ¹⁴ Neremri Haneyen Kraiſ Jiſas re anne pap meten kwobo labo wule yenbowai nenem, an rene omuteke habon agerbo tatame remne pap yewom. Re kemne mere etop nenbo.

¹⁵ Gwor et tuma sekenwai. An selbo, nugwape tatame rem er tuma poten God rene omuteke mette. Kraiſ Jiſas re God reri kwom mesege-nen nowselke yam, re yaper wos nenbo tatame remne potte yam. Metye. Kiyi an tame yaper etemkap temenem, an remne aboyei teitkwunen wos yaperwai nenbem. ¹⁶ Op temenem, eker God re anne pap metem. Tatame rem mette, Kraiſ Jiſas re anne yaper sein be nenem. Yehow. Re anne pap meten heyarem. Op mette, Jiſas rene yuri omuteke habote tatame rem op habote, Pol re tame yaperwai temenem, Kraiſ Jiſas re rene heyarem. Eker re nemne etop kirkir nente. Re nemne kwobo late, nem heyar somsom temente. Etop habote, eker God re anne kiyi pap bukſe metem. ¹⁷ An God eterri ſig bukſe som webo. Re kiyiri tatame, yuri tete tatame etemri Keryen Yen bukſe. Re be sate. Re somsom temente. Nem rene lek be labo. Eterwou re nemri Keryen Yen bukſe. Nem eternewou som lom yokwobet. Et sekene.

Timoti re ei bukſe nayan wule yaper teitkwunte.

¹⁸ Timoti, ne areri yen. An nene wete tuma ne etop nente. Kiyi God Reri Tuma wesowbem tame rem neri nenbo wule wem. Et tuma ne poten ei nayan wule yaper teitkwunte. ¹⁹ Ne omuteke som

habobet, ne wurbai yenbowou nenbet, ne peiktame remkene kebasi nayen yin teitkwunte. Rane tame rem wuribai yenbo be nenbem, rem wule yaper nenbem, eker rem God rene som be habobo. ²⁰ Tame pes, Himeneuskene Aleksanderkene rep etopkap nenem. Rep God rene tame kwoyabo. Eker an repne Satan reri letke rasen re repne yaper nente. Repne yaper nente, rep purere poten God rene tame sene be kwoyate.

2

Nem God rene wemette, re aboyei tatame remne kwobo late.

¹ An nene webo tuma gwor. Temnas yi tuma, ne nugwape tatame remne wete, rem God rekene kwokwos kwokwos namrebet. Rem rene wemetbet, re aboyei tatame remne kwobo labet. Rem rene wese abet. ² Rem nowselri keryen yenkene gavman tamekene remne habon God rene, remne wemetbet, re remne kwobo late. Etop nente, nem heyar site, nem God re habobo wule nem nente. ³ Et wule yenbo. Nem etop nente, nemne Sene Potbo God re nemne metekwaste. ⁴ Re aboyei tatame remne potte selbo. Rem eterri tuma sekene reri tobo heyar mette, re etop selbo. ⁵ Nem mettene, God wuriketwou tetane. Tame wuriwou re tatamekene God eterkene etemri borborke tetane. Er tame re Krai Jisas. ⁶ God reri kiyi wem yabelke Krai re reri wesom be habom, re aboyei tatame etemri gwulek tupan sam. Op nenem, nem mettene, God re aboyei tatame remne potte selbo. ⁷ Otkap, God re anne lebam, re anne werasen

yaku newom, an Juda bo remne eterri tuma wesowbo. An tuma sekene webó, an be yikokobo. Juda bo tatame rem God Reri Tuma sekene heyar meten rene omuteke habote, eker an God Reri Tuma remne peikbo.

⁸ An selbo, aboyei kwomri tatame rem let nenuwte, God rekene tuma namrebet. Er tatame rem remri purere wuribai God rene newon yenbowai tete. Rem pap be yokte. Rem gwule be tete. Op nente, rem God rekene heyar namrete.

Yaku yenbo nenbo wule et ta remri wolebo kerapkap.

⁹ An Jisas rene omuteke habobo ta remne webó. Rem wuribai yenbo ten tame oub yenbo wolete. Rem tame oub kap leketakette. Rem tare take kap baste. Rem tokwo bukrek tupabo tame oub, nekel wankel kap tupan wolete. ¹⁰ Ta rem God Reri Tuma tobote, rem metkereke wule yenbo heyar nente. Op nentek, et etemri kerap yenbokap. ¹¹ Ta rem kworer teitkwunen elen me sin God Reri Tuma mette. ¹² An sewaibo, ta rem tameyen remne God Reri Tuma kap peikte, remne kap teitkwunte. Yehow. Ta rem elen me sin wan taite. ¹³ Berke an etop webó? God re Adam rene kiyi nenem, yuri re ta lv tene nenem. Eker an etop webó. ¹⁴ Adam re yikoko tuma omuteke be metem. Iv etet, te Satan reri tuma omuteke metem, te God reri wule biragiyem. ¹⁵ Ta remri yaku rem yen sete. Ta rem Kraiss rene omuteke som habobet, rem elen me sin tatame remne heyar som nenbet, rem wule yenbowou nenbet. Er ta God re remne pap meten potte, rem pow tete tetane.

3

God rene omuteke habobo tatame remri lakere tame rem wule yenbo nente.

¹ Gwor tuma at tuma sekene. Yike tame re God rene omuteke habobo tatame remne lakerete yaku nente selbo, re yaku yenbowou selbo. Er tuma et sekenewai. ² God rene omuteke habobo tatame remne lakere tame rem gwopkap nenbet. Rem wule yenbowou nente. Tatame rem er tame remri wule wuri yaper be late. Rem ta wuriketwou panete. Rem ok yaper o awos nugwape kap ate. Rem wuribai yenbo temente, rem agerbo tatame remne yenbowou nente. Rem let papkene tame temente, rem sipkwom yabo tame remne awos newon ate. Rem God Reri Tuma agerbo tatame remne heyar peikte. ³ Rem ok yaper be an sisi be pete, rem pap be yoken agerbo tamekene ei be naite. Rem ei be nogwate, rem agerbo tatame remkene heyar me site. Rem kel sou be habote. ⁴ Rem remri yenta heyar lakerete, yenta rem etemri kulke temente, rem heyar temente. Rem yen remne be wos nente wete, yen rem mangure be tete, rem remri tuma mette. ⁵ Tame rem etemri yenta remne heyar be lakerete, rem God rene omuteke habobo tatame remne mapurke heyar lakerete? ⁶ God rene samsamke habobo tame rem God reri tatame remne lakerete yaku kap potte. Rem er yaku potte, rem kworer sig bukure wete. Op tete, God re Satan rene tuma nenemkap, re er tame remne etop kirkir nente tetane. ⁷ God rene omuteke be habobo tatame rem tame rene tame yenbo webou, er tame eterwou re God rene omuteke habobo tatame remne lakerete

yaku potte. Re sig yenbo bo, tatame rem er tame rene tuma yaper webu, Satan eterri watep rene potte tetane.

God rene omuteke habobo tatame remne yaku nen tame etemri nenbo wule.

⁸ God rene omuteke habobo tatame remne yaku nen tame rem remri yaku heyar habote. Rem taule pes kap tete. Rem wain ok yaper nugwape kap ate. Rem kel nugwape potte kap habote. ⁹ Rem habote, God re remne labo, rem yaper bo. God re rene omuteke habobo tame nemne peteram tuma sekene rem heyar sete. ¹⁰ Yaku nente tame ne remri nenbo yaku kiyi seilate. Rem yaku yenbo nente, rem God rene omuteke habobo tatame remne yaku nenbet. ¹¹ Remri ta etem mere, rem etemri nenbokap heyar habote. Rem kerabo tuma kap wete, rem ok o awos nogwape kap ate. Bo wos rem nente, rem yenbowou nenbet. ¹² God rene omuteke habobo tatame remne yaku nen tame rem ta wuriwou panete. Rem remri yenta remne heyar lakerete. ¹³ God eterri yaku heyar nenbo tatame rem wos pes potbo. Wos wuri et rem sig yenbo potbo. Wos wuri et eme Krai Jisas eterne kenawaike abobokap reme mol pan teten tatame remne heyar wesowbo.

God eterri wule reri tobo et bukri wos.

¹⁴ An habobo, an agetage kemne lasyate nenbo. An nene gwor siglow kiyi basrasbo, an habobo, et yenbo. ¹⁵ An agetage be yatek, kem gwor siglow late. God eterri tatame remri nenbokap an kemne basrasbo. Nem somsom tetane God eterri tame beig. Nem nawo segkap, nem tuma sekene heyar

sebo. ¹⁶ Ekeya. God eterri wule tobo et kik tetane tuma. An tuma sekene webu. Et gwopkap.

Re more tame tem. Aboyei
tatame rem rene lam.

God Reri Wow re nemne
peteram, reri nenbemkap
et yenbowai.

God eterri kwomri tame
rem rene lam.

Tame rem eter nenbem wos
kwomke kwomke
wesowbem.

Aboyei nowselri tatame
rem rene omuteke habom.
God re rene Hevenke panen
yawum, re sig bukri potem.

4

Agerbo agerbo yikoko tuma et tatame remri wuribai yaperke nenbo.

¹ God Reri Wow re tuma kwudi site op wem. Yuri rane tatame rem Krai rene mesegente tetane. Rem arkwu gabwo remri yikoko tuma meten nente tetane. Re etop wem. ² Er yikoko tame rem nugwape tatame remne tuma yikokote. Yikoko tame remri wuribai yaperwai. Remri yaper nenbomkap rem be habobo. ³ Er tame rem ta panebo wule rem suwaibo. Rane awos rem tatame remne suwayen be ate. God re etop be webu. Re aboyei awos nenen op wem. Kem anne omuteke habobo tatame, kem tuma sekene metbo tatame, kem nogwape awos poten anne wese an awos ek ate. ⁴ Nem mettene, aboyei wos God re nenem, er wos et yenbo woswou. Eter nenem

wos nem kap sewaité. Yehow. Nem rene wese an potte. ⁵ Opkap, be awos nem poten God Reri Tumakene God rene wese abo wulekene God re op wete. Er awos et awos yenbo.

Timoti re Kraisi eterri yaku nen tame yenbo tete.

⁶ An nene basrasbo tuma ne God rene omuteke habobo gesmase remne weiwete, ne Kraisi Jisas eterri yaku nen tame yenbo tete. Nemri omuteke habobo tuma ne kitimena bukri potte. Tuma sekene ne heyar meten nenbo, eker ne kitimena potbo. ⁷ Nowselri tatame etemri yeiwarege sike ne kap meten kap namrete. Et sike bop. Et God Reri Tuma bo. Kwokwos kwokwos ne God eterri wulewou nenbet, ne Jisas rene habobo tame sespe te. ⁸ Wesom kitimena potte wule nem kwokwos kwokwos nenbo, et nemne kwobo sow be labo. Nem God eterri wule kwokwos kwokwos nenbo, et nemne kwobo nugwape labo. Nem nowselke temente, et nemne kwobo late, nem heyar temente. Yuri nem Hevenke yaute, nem heyar somsom temente. ⁹ Er tuma et sekene. An selbo, aboyei tatame rem er tuma poten omuteke mette. ¹⁰ God re aboyei tatame remne Sene Potbo Tame. Nem rene omuteke habobo tatame, re nemne potte tetane. Nem somsom temente Keryen Yen God rene omuteke habobo, re nemne potte yabel nem etop kowtene. Eker gwopte nem yaku bukri keren mus metbo.

¹¹ Er tuma ne tatame remne heyar weiwen peikte. ¹² Ne muyensi yen tame. Tatame rem kap op wete. Timoti re muyensi yen. Re tame bop. Rem etop kap wete, eker ne God rene

omuteke habobo tatame remne wule yenbo peterate. Ne tuma yenbowou wete. Ne yenbo woswou nente. Ne tatame remne pap yewote. Ne Api rene omutekewai som habote. Ne wule yaper mane nente. ¹³ Yuri an nene lasyate. An agetage be yate, ne anne kowmente, ne tatame remne God Reri Siglowri tuma lan wesowbet. Ne remne tuma heyar weiwebet, heyar peikbet. ¹⁴ God Reri Wow re nene kiyi newom kitimena ne som habon nenbet. Kiyi God eterri tuma wesow tame re nene op wem. Re kitimena potte. Op wem, God rene omuteke habobo keryen tame rem nene let tarek rasem, God Reri Wow re nene kitimena ek newom. ¹⁵ Kwokwos kwokwos ne God reri yaku nenbet. Ne agerbo wos kap habote. Op nente, tatame rem neri yaku late, rem op wete. Timoti re Jisas rene habobo tame sespe tem. ¹⁶ Neri nenbopak ne heyar lan habote. Ne remne peikbo tuma ne heyar meten habote. Ne etop som nenbet. Ne etopwou nente, God re nene potte. Neri tuma metbo tatame etemne mere, God re remne potte.

5

Timoti re tatame etemne eterri gesmasekap late.

¹ Ne ker tame remne gwulek kap tete. Ne remne tuma heyar wesowte. Nereri ha, ne rene webopak, ne remne etopkap wete. Ne neri mase remne nenbopak, agerbo muyensi yen rem God rene omuteke habobo, ne remne etop nente. ² Ne neri nawo tene nenbopak, ne agerbo ker ta remne etopkap nente. Ne neri gesi remne nenbopak, ne

muyensi yen ta remne etopkap nente. Ne remne wule yenbowou nente.

Yike rem wana ta etemne lakerete?

³ Wane ta te lakemase bo, o nare o yenken e bo, ne tene heyar kwobo late. ⁴ Yennan tetane wane ta, yennan rem tene heyar lakerete. Kiyi te remne heyar nenbem, sene rem tene heyar sein nente. Op nente, God eterri webo wule rem yenbo nente. Opkap nenbo tatame remne God re metekwasbo.

⁵ Wane ta te wiysage tetane, te God eternewou omuteke habobo. Te God rene omuteke habon re tene kwobo late, te neirkene yabelkene God rekene tuma namrebo, re etop nente. ⁶ Rane wana ta rem kworer habobo, rem remri wuribaiwou nenen yaper wos nenbo. Op nenbo wane ta rem tetane, rem sam takap. ⁷ Ne ta remne wete, rem God rekene tuma namrete. Etop nente, rem wule yenbowou nenbet, tatame rem temne ta yaper be wete. ⁸ An webo. Yike tame re reri nawoha, owyi heyar be nenbo, reri akek tetane tatame remne be lakerebo, er tame re God rene omuteke habobo wule mesegenbo, re tame yaperwai. God rene be habobo tame rem opkap yaper wule be nenbo.

⁹ Wane ta sekene rem nabe nugwape (60) tetane, rem tame wuriketwou yimenem, opkap wane ta ne remri sig poten remne kwobo late, ¹⁰ Wane ta rem yaku yenbo nenbem ta. Rem remri yen remne heyar lakerebem. Ren sipkwom yabem tatame remne pap yewon remne awos newon abem. Rem God rene omuteke habobo tatame remne heyar nenbem. Rem God rene omuteke habobo tatame remri tewo ok keyabem. Pap yaper tebem tatame o mus metbem tatame remne

rem heyarbem. Rem agerbo agerbo yaku yenbo pap teten nenbem. Opkap wane ta remri sig ne poten tene kwobo late.

¹¹ Wane ta rem ker bo, ne remri sig kap potte, remne kel kap newote. Opkap wane ta rem Kraisi eterru yaku nente webo, yuri rem tame yite habobo, rem Kraisi rene magel taibo. ¹² Op nente, God rene kiyi natebom tuma rem biragiyebo. ¹³ Etopwou bokem. Opkap muyensi yen wane ta rem yaku pwoibo, rem agerbo agerbo akek yin tuma wesow sapen sewurbo. Rem etopkapwou be nenbo. Rem kerabo tuma namrebo. Rem yaper nenbo. Eker ne remne kwobo kap late. ¹⁴ An selbo, wane ta rem ker ta bo, rem tame sene yin yen sete, rem yenha remne heyar nenbet. Opkap nente, nemne yaper nente webo tame rem late, rem nemne tuma yaper be wete. ¹⁵ Kem mettene, rane wane ta rem wule yenbo kiyi magel tayem, rem Satan reri wule nenbo. ¹⁶ Metye. Wane ta rem yen tetane, o lakemase o nare tetane, etem rem tene heyar lakerete. Op nente, God rene omuteke habobo tatame rem et wane ta tene yaku bukri be kerete. Rem wiysage tetane wane ta etemnewou kebasi lakerete.

Jisasi rene habobo tatame remri keryen tame rem yaku yenbo nenbo, nem remne heyar lakerete.

¹⁷ God rene habobo tatame keryen tame rem yaku yeno nenbo, kem remri sig bukri newote, remne kem tokwo degerbekene newote. Tame rem yaku bukri nenen God Reri Tuma heyar wesowbo, God eterru wule heyar wesowbo tame kem remne tokwo degerbekene newote. ¹⁸ God Eterri

Siglow re tokwo newobo wule op webo. Kem rais supa tetbesbo bulmakau remri tumas kep kap peikte. Kem remne pelebiten rem hame rais supa rane ate. Et yenbo. God Reri Siglow sene op webo. Yaku nenbo tame rem tokwo potte. ¹⁹ God rene omuteke habobo tame remne lakerebo tame rene tame wuri re tuma op wete. Gwor keryen tame re wos yaper nenem. Op wete, ne reri tuma epye omuteke kap mette. Agerbo tame pes o mur rem etemri lek kirkir layekap rene tuma nente wetek, ne remri tuma omuteke mette. ²⁰ Op nente, ne sanete, re yaper nenem, eker ne nugwape tame etemri bitmik rene tuma ek nente. Op nente, agerbo tame rem lan akte, yaper wos be nente.

²¹ Metye. God, Krais Jisas, God eterri kwomri tame etem mere, rem tetane. Remri bitmik an nene omuteke op webo. An nene weye tuma ne heyarwai nente. Rane tame ne remne tuma putuwte, agerbo tame, neri kwomri tame, ne remne pap meten tuma be wete, et yaper. Ne etopkap kap nente. Tame rem nenbokap, ne remne tuma putuwte o sig yenbo wete. ²² Ne God rene omuteke habobo tatame remri keryen tame remne epye kap leban rem God reri yaku nente. Tame rem yaper nenbokap ne mane nente. Ne kworer heyar lakerete, God re late, ne tame yenbowai.

²³ Neri sigowk tewo nogwape mus yabo, eker an nene webo. Ne kelpokwou kap ate. Ne wain ok kera kirkir ate, neri sigowk kwuye mete.

²⁴ Rane tatame rem yaper wos kwom geike nenbo, agerbo tatame rem remne tuma nugwape putuwbo. Rane tatame rem yaper wos berasen

nenbo. Remri yaper wos et yuri tegek tete tetane.
²⁵Yenbo nenbo wule mere, rane tame rem nenbo, nugwape tatame rem labo. Rane rem yaku yenbo nenbo, nugwape tame rem remri nenbo yaku gwopte be labo. Remri nenbo yaku yenbo et yuri tegek tete tetane.

6

Yaku bop nenbo tame rem wule yenbo nente.

¹ God rene omuteke habobo tame rem agerbo tame remne yaku nenen tokwo be potbo, rem yaku bupo me nenbo tame. Er tame rem remri yaku lakere tame remne wule yenbowou nente. Op nente, tatame rem God reri sigkene nemri peikbo tumakene yaper be wete.

² God rene omuteke habobo lakere tame remri yaku bupo me nenbo tame rem kap op wete. Nem God rene omuteke habobo tamesip tamesip, eker nem remri tuma be mette. Rem etop kap wete. Rem op habote. Nemri lakere tame rem Krai rene omuteke habobo tame, nem remne pap yewote. Op habote, rem remri yaku yenbowai nenbet.

Kel sou habobo wule et wule yaper etერი tobo.

Ne Jisas rene omuteke tatame remne kwokwos kwokwos neluwen er tuma heyar peikbet, rem wule yenbo nente, ari nene weye tuma ne remne etop wete. ³Nemri Haneyen Jisas Krai re nemne God reri wule heyar peikem. Tame rem agerbo wule peikte, rem Jisas reri peikem wule sekene be peikte, et yaperwai. ⁴ Op peikbo tame rem purerekene bo. Rem remri sigkworer bukrebupo me webo. Op webo tame rem wuribai yaper

tetane, rem tuma naurabo. Remri webó tuma et tame niyok papyok tuma webó. Remri tuma metbo tatame rem sene gwule tebo, rem ragiy eibo, rem ei naibo, tame kwoyebo, rem lakemase remne yaper habobo. ⁵ Kwokwos kwokwos rem tuma naurabo. Opkap tame remri wuribai yaperwai. Rem tuma sekene kebese be metbo. Rem op habobo. God reri yaku et kel potbo kelow.

⁶ Tuma sekene. Tatame rem God eterri wule heyar nenbo, God re remne newobokap rem okbop tebo, er tatame rem heyarwai tetane. Rem woskene tatamekap. ⁷ Nemne nawo warwiyem wule nem wosbas be sen yam. Yuri nem sate wule nem wosbas mapurke sen yite? ⁸ Eker, gwopte nem awoskene kerap wole woskene tetene, nem okbop ten op wete. Et yowkem. Et yenbo. ⁹ Nugwape wos potte habobo tame remne Satan re keikeren seilate tetane, omap rem manke wurbokap re remne seilate. Opkap tame rem agerbo agerbo wos yaper nente tetane. Rem yaper wos nenen wuribai yaper tete tetane. Yuri rem sate, rem yaperwai tete tetane. ¹⁰ Kel potte okbop tebo wule, et wule yaper reri tobo. Rane tame rem kel okbop tebo, rem God rene mesegente, rem lim nugwape sete tetane.

Tame re kitimenakene amete, re heyar somsom temente wow potte tetane.

¹¹ Timoti, neren, ne God eterri tame. An nene webó. Ne wule yaper magel taite. Ne wule yebowou sete. Ne Kraisi eterkap tete. Ne eternewou omuteke habote. Ne agerbo tatame remne pap meten heyar nente. Ne lim sen heyar tetete. Ne agerbo tatame remne elen me wen heyar nente.

¹² Tame re Kraiss rene omuteke habote, re tame re amebokap. Ne rene omuteke som habote, ne heyar somsom temente tetane. Ne etop nente, God re nene wepotem. Ne rene omuteke habobo, ne nogwape tatame remne etop wesowem, ne heyar somsom temente tetane.

¹³ Aboyei wos heyar lakerebo God re tetane. Pontius Pailat rene heyar sein wem tame, Kraiss Jisas eter mere, re kirkir tetane. Repri bitmik an nene op webo. ¹⁴ Ne God eterri wule heyar som sete. Ne wule yaper kap nente, agerbo tame rem er wule kap teitkwunte, yaper kap wete. Ne er yaku nenen yin Haneyen Jisas Kraiss re sene yate tetane. ¹⁵ God re wem yabel tetek, Jisas re tegek tete tetane. Metekwasbo wule reri tobo et God eter. Re kwom panen sitene tame remri Kwom Panen Sitene Tare Tame. Re keryen yen tame remri Keryen Yenwai. Re haneyen remri Haneyenwai. ¹⁶ Eterwou re be sate tetane. Re yabel bukrene pastene emik tetane, eker tatame rem rene mekni be yite. Rem rene be latene, rem rene kebesi be late. God reri kitimena bukrene somsom temente tetane. Nugwape tatame rem God reri sig yenbo som webet. Et sekene.

Wos nugwape tetane tame rem God rene omuteke habon agerbo tatame remne kwobo late.

¹⁷ Ne nowselri wosbas nugwape tetane tame remne op wete. Kem kemri sig kworer bukrene kap wete. Kem agerbo tatame remne kap teitkwunte. Nowselri wos et agetage yaper tete tetane. Opkap, kem kap op habote. Nowselri wosbas et nemne kwobo late. Yehow. Kem God rene omuteke habote. Re let papkene tame, re nemne agerbo

agerbo wos yenbo newobo, nem metekwasbo. Ne remne etop wete. ¹⁸ Ne wosbaskene tame remne sene op wete. Kem yaku yenbo nente. Kem nugwape yaku yenbo nente, kem metekwaste. Kem gesa kap tete, kem let papkene tete. ¹⁹ Kem wule yenbo op nentek, yuri God re kemne yenbo sein nente tetane, kemne op wete. Kem heyar somsom temente. Et wule sekene. Ne wosbaskene tatame remne etop wete.

Timoti re reri yaku heyar lakerete.

²⁰ Timoti, God re nene newom yaku ne heyar lakerete. Rane tame rem God reri tuma be namrebo. Er tuma ne magel taite. Etop namrebo tame rem yikokon op webo. Nemri namrebo tuma et purerekene tuma. Er tuma webo tame remne ne meknik kap yite. ²¹ Rane tame rem er tuma omuteke metem, rem God rene mesegenen rene omuteke sene be habobo.

God re kemne pap meten kwobo late.

God Reri Teiktem Tuma Ager
The New Testament in the Yamano Dialect of the
Yessan-Mayo Language of Papua New Guinea
Nupela Testamen long tokples Yessan-Mayo Yamano long
Niugini

copyright © 1980, 2004 Lutheran Bible Translators

Language: Yessan-Mayo (Yamano) (Yessan-Mayo)

Dialect: Yamano

Translation by: Lutheran Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 4 Mar 2023 from source files dated 9 Oct 2020

61a6ffd9-3aa5-58b7-982d-b5ada9490557